

養知書屋文集

養知書屋文集卷十八

湘陰郭嵩燾筠仙著

郭武壯公家傳

公諱松林字子美湘潭人父縉修有學行名能書畫生平應人之急不爲有無計人稱長者公少跣弛不羈以武健魁奇自喜讀書略觀大意嘗發憤言功名惟意指取度其父世儒不敢開陳己意一日適市聞威毅伯曾公提師出吉安卽走赴之於道見鬻馬者驅馬數十睨其一駿馬也披取樹枝斷而挾之爲箠出不意騰躍馬上急鞭之一日夜馳數百里曾公奇其貌畱帳下每戰

先登無當其鋒者稍稍領一軍攻城陷陣功常最肅毅伯李公援上海詣曾公言曰某軍新集願得強悍如郭某者倡勇敢導先士卒曾公慨然資以行公益自奮堅城大敵以身當之不爲前後顧慮而所至亦皆應時奏功其克無錫也方相持搏戰而公間道率輕騎掩至薄城急緣以上賊噤不得施諸軍亦皆驚顧相咋當是時郭軍剽悍之名聞天下旣克常州定諸城邑遂復蘇州始以參將從李公游至提督授福山鎮總兵功益高名益顯而未嘗以勳績自多平居恂恂虛心善下於諸將帥皆得其歡心積功敘階聞其超遷咸喜相告以爲宜

莫有忌嫉李公所部諸將皆淮人負氣陵上一語不得  
怒哮相詆是以李公尤倚重公如左右手焉李公臨事  
尤持大體方蹙捻匪山東李公駐東昌與山東巡撫丁  
公分河爲守而劾奏山東守將失律事丁公大憾公曰  
臨敵將帥不和於兵法爲大忌且山東主人而我爲客  
客下主人在禮爲宜乃以李公命詣丁公反復開說二  
公省悟交歡守河之議始定而事卒以濟公於是時權  
衡緩急輕重引大局爲喻所保全尤大然則公之功蓋  
非徒戰勝攻取之爲也初任福建提督未赴改湖北凡  
再任又改直隸所至兵服其教民懷其德常日夕退坐

東堂延納賓友討論古今成敗得失驗知其行事若者可法若者可以爲鑒從容雅歌意量無窮其風尤可尙也公生於道光十三年癸巳歲十一月二十二日卒於光緒八年庚辰歲四月二十一日年四十有一其卒也妾趙氏仰藥殉焉督臣具其事以聞得  
旨旌表君子知公所以庇其家者其教又行於女子也

郭嵩燾曰武壯之起於諸將爲晚出其家儒者有士君子之風余自廣東罷官里居武壯亦以憂歸日與往來甚勤未嘗聞其談說戰爭時事也其弟函萬狀其行實求銘亦不詳要其大節表表在人耳目得採掇其大凡

揭之墓道其軼事尙多可紀者就余所知畝略多矣然  
往往有關天下利病大計其語祕非世俗所稱道余竝  
論次爲壯武公別傳以遺其家藏焉

任府君家傳

君諱瑛字憩棠姓任氏先世自宋南渡時由河南偃師  
遷宜興二十四傳至君曾祖曰朝銓歲貢生祖曰醇文  
縣學生父曰懋先縣學生君生數月而父卒母湯太夫  
人守節自勵以長以教年十六母卒依祖父以生益發  
憤自砥於學舉甲午科鄉試又十四年丁未成進士年  
四十有五矣以知縣分發湖南卽用補桃源縣知縣調

補武陵值粵東西寇亂出郴永間多倚君營辦所補缺  
皆不及受事始署祁陽縣調署桂陽州旋攝嘉禾移知  
武岡州最後署永順縣兼權知永順府巡撫惲公保奏  
以道府用凡蒞仕湖南二十年初任祁陽值歲饑轉米  
衡陽平糶因仿朱子社倉法導民積穀立同仁局治棺  
具以賙貧者三年吏效其誠民懷其惠相與刻石浯溪  
紀其政行是時廣西金田賊起乘湘水而下越永踞道  
州烽火逼祁陽君亦募勇習兵而永桂土寇肆發粵東  
西賊乘之擾亂邊境無甯日君亦調署桂陽州旋知嘉  
禾並賊所往來蹂躪甫至桂陽賊犯新田急大府檄援

君馳抵新田助守城以蠟書告急今山東巡撫陳公士杰時陳公奉檄治鄉兵防桂陽一路悉眾至奮擊守城兵亦噪呼而出賊遯城卒完君於其時掇拾殘破之眾瘡痍之餘噢咻煦嫗以時蘇息亦終君桂陽嘉禾兩任無寇警嘉禾故礪瘠君在任至無以舉火曾文正公治兵長沙察君清介餽二百金曰以助君廉無以飢寒自阻任武岡治盜捕得楊升者奇其貌廉知其非怙惡釋之其後粵寇朱宏恩陷東安趨犯寶慶武岡土寇尹二聚萬餘人應之楊升以變告且願爲導君急馳擊之斬尹二武岡以安其後任永順粵寇李復猷隨石逆入蜀

謀結苗匪擾辰沅君扼永順之衝以間阻之李復猷回  
竄粵東君名以大振敘功保以道府用而君遽引疾歸  
自言在官二十年出入兵燹之中無所顧戀而不爲寇  
傷飢寒困頓無所惜而亦終無官累得此足矣歸宜興  
十八年以疾終於里第君和夷粹溫終身無喜愠之容  
寡言笑廣坐議論靜默自守而發言必當人無以難之  
所至推誠與人輸寫心臆一無隱闕遇事疑難未嘗動  
聲色委曲往復必得其情是以人皆樂君之寬而服其  
誠夫人儲氏父進贈奉政大夫爲宜興望族其歸君獨  
祖父存耳夫人服勤左右必肅以誠君應禮部試京師

祖父患疽發背夫人日以舌舐之所患以平從之官一  
安儉約不易其素而數出私財佐君拊循百姓之阨艱  
者始祁陽聞寇警獄繫囚爲多君患之夫人戒僕役謹  
視囚時其凍飢滌其穢汙以安囚囚皆感泣君亦嘗言  
在祁稍得官譽夫人之助也先君三十一年卒君生於  
癸亥八月二十八日卒於甲申二月十三日年八十有  
二子四人日子中湖南候補府經歷日子誠候選員外  
郎日子齡以知府分發浙江賞戴花翎其季曰淦側室  
文氏出女四人孫十三人曾孫三人所著綴園詩文集  
若干卷其乞歸也捐所墊發軍需銀二萬五千兩廣宜

興文武學額宜人至今傳誦之

論曰吾於君爲丁未同年其時以知縣發湖南竝君九人戚少雲莊寄漁王槐軒以才能稱黃子春尤磊落權奇龐子臨雷蘊峰王定夫葉辰生誠篤端謹稱其志意目前用科目分發無及丁未人才之盛者未三十年淪喪以盡獨君杖履林泉垂二十年享田園子孫之樂小棠郡守狀君行迹乞爲家傳回思戊申乙酉間同集會城燕飲相歡其間和愉愿慤淵然盛德之容尤莫君若也又益推知先世之孝節流貽終以裕其家而昌其後蓋所從來遠矣

李石帆別傳

石帆先生諱濟湘姓李氏世居邑之梓木洞生而誠樸篤於孝友幼從父讀於書皆能窺知其要義數奇屢試不售援例入太學家固饒也數分析而生齒日益繁多其父慶堂先生以名諸生授讀五十年足迹不出鄉井石帆始冠卽爲遠游假館鄉塾資其束脩以爲養而尤邃於醫不樂以術名也鄉人病者爭延致之試其方輒驗石帆顧不樂受謝曰此吾寄耳而人命繫焉不當資是以爲生也旣其父年高石帆則屏棄一切課其子躬耕食力而身自捫耨米鹽零雜節衣縮食以致養於其

親咸豐初廣西寇發自湖以南盜賊蜂起駱文忠任巡撫督各州縣治團練自衛石帆於鄉里爲有能名於是任鄉團之役先後凡十餘年恪靖侯左公避地深山尤偉視石帆凡有事於鄉里輒資石帆任之比曾文正公督師東下徵兵轉餉取資湖南捐輸釐課次第舉行石帆又任籌餉之役會辦益陽釐務又調澧州湯公煊爲總辦尤倚重之事必諮而後行與兵事始終亦十餘年晚乃盡以家事屬之諸子閉戶養神淵默自修鄉人益沐其化凡有辯爭齟齬得石帆一言以解蓋不知其幾也其斯孝友循循爲善於其鄉者與石帆之母於吾爲

從姑賢聲溢於鄉里無少長皆樂道之吾於石帆少相知也其後與恪靖避地山中益與石帆習其夫人常氏又益賢吾數十里顛沛相依埽除廳事棲予猶家人骨肉之相卹也吾與恪靖宦游於外所見人心風俗之厚誠無若梓木洞者其時石帆之父慶堂先生猶健在諸弟如鹿苹廣文皆能詩古文辭朝夕過從處兵戈擾攘之中而山水朋友之樂乃獨聚於一時自吾應詔再出爲海外之游而鹿苹亦前卒慶堂先生墓木拱矣比歸而石帆又卒人事變遷而盛衰聚散之不常爲重可悲也其孫麓漁適館予家出其祖行實屬予爲之傳

稍就所知論次之石帆生於某年某月卒於某年某月  
年七十四歲夫人常氏長沙處士東立女先石帆十二  
年卒實生於某年某月卒於某年某月子幾人某某孫  
幾人某某其長者卽麓漁也石帆次子人森甚賢而有  
文以療疾卒石帆夫婦哭之痛夫人常氏之卒以哀其  
子遂疾篤石帆亦以是愴然不適於心此尤可悲者也  
光緒九年仲夏月

樗叟家傳

君湘陰郭氏名崑燾字意城晚自號樗叟生二歲母張  
太夫人教之識字所攜玩具一破硯及諸斷縑碎簡不

隨羣兒嬉弄年十二補郡學生又九年舉於鄉其文固已斐然傑出於時而性簡重檢束繩尺不苟言笑咸豐元年 詔舉孝廉方正邑之人皆曰是推君宜時居

父光祿公及太夫人喪涕泣拒之明年廣西賊圍長沙巡撫銅山張公至君與左公應召主軍事自是以身任湖南安危二十餘年張公移督武昌賊始棄城東下掇拾瓦礫支木爲居公私埽地以盡城無居人於時巡撫駱文忠公方伯漱浦嚴公廉訪江忠烈公稱盛一時每日夕會事督署明日某治某事某治某事君操筆記其事以授所司明日日夕報聞則更議所行以爲常興廢

舉敝日新月盛張公每夕手挈總督關防以屬左公及君曰軍情緩急眉睫間耳有發先行而後告李開方擾懷慶自河南折而南夜半得報急調兵會鵝公頸驟與賊遄賊出不意大擾亂斬李開方殲其軍報至張公始知賊之分馳北竄者於是燿焉君嘗以自喜言稍逾時使賊徐行出平地害可勝言哉張公自任天下之重而任人尤信不疑雖在危難日忻忻以樂也張公旋調撫山東罷歸語君吾在兩湖得君二人爲助以有成功山東求一人不得是以無成駱文忠公自湖北移撫湖南曾文正公奉命合水陸之師東征軍資所出一倚

左公及君營辦左公旋亦治師浙江君內簡軍實外籌天下大局援江援鄂援皖援浙援粵援滇援黔援蜀征兵四出隨事緩急聞警輒赴凡軍行山川險要策應遲速及將帥能否高下審事量敵受成於心惟所指發應弦赴節每軍出轉餉數千里遠輸近委未嘗有匱君一以任之自湖南始被兵訖粵匪之滅十餘年以一省之力支柱東南大勢君之力爲多君名能知人察幾觀變自守尤嚴涇縣翟公權撫事旬月君急引歸遣官四五輩就家彊起之君辭益堅吾問曰此其禮隆意勤不可少屈乎君曰矯亂者持其敝辰沅道請保防邊八百人

嚴斥其濫翟公曰無然我爲正之比具摺增加至九百人是且爲無畦町吾亦與爲無畦町無甯已矣其後厯城毛公至君旦入治公牘夜常就宿釐局曰治釐吾事也吾言日夕僕僕自苦何爲君曰吾得進退自由無顯去之迹亦所以全交也其於駱文忠公陽湖惲公景東劉公二十年訢合無閒視君所爲若出其身君亦視所治事若治其私蓋君才志足以濟世宏務寬明仁恕不立崖岸要其心求利國家不以利己介然之節未嘗一日苟安其身多人所不知者由舉人保國子監助教內閣中書至四品卿加三品銜

賞戴花翎皆祕不使

君知君知輒乙去曰吾自度不任仕宦多受國恩非所安也江南平卽辭去景東劉公討貴州苗力起君苗將平又辭去軍興有成勞又在事久名蹟顯異莫逾君而敘功莫儉於君其行誼未知視古人何如要可謂性之安者矣年六十以無疾終其葬也平江李次青方伯銘其墓長沙王益吾祭酒又爲碑文樹之墓道載君行事甚詳嵩燾因摭拾君之軼事有關大節及天下所以盛衰別爲之傳藏於家其文章志行施之家而推惠鄉里爲時所傳誦不備述焉

馮府君家傳

君諱家浦字南雲姓馮氏宋參政文簡公之後有由江夏遷江西之豐城者十世孫中元值元末之亂再遷長沙十數傳曰序錦者是爲君之祖生子五其季曰傳儀君之父也長曰傳儂無子君出後焉少貧廢學娶妻毛氏生子三女二而卒時君年三十子長者十歲少者生始七月而所後父母皆在君旣以身任衣食上事父母下撫孤煩勞委細事皆辦或勸之娶君曰吾力能勤子又多卽要有參差徒自苦何爲遂終不娶子卓懷官萬縣知縣君就養入境喜曰吾不以仕宦榮喜循聲之達於民也其迎養在官如其在家一處以勤儉逾年歸歸

又逾年卒君豐頤偉幹貌赤色亢直敢言喜排難解紛鄉里忿爭有告者雖賤微必往質之剖論曲直使皆服乃已嘗塗遇兩婦人詬誶一女郎從問之爲某氏養媳也失一衷衣其母與其姑互相詰將要諸神君曰無然吾爲若償之兩婦人謝散去自萬縣歸益務爲善修楓林港石路以便行旅以馮氏自元至今族人生齒日繁總祠未建倡議建祠修譜君卒後卓懷卒用君志成之其精強任事識大體皆此類也君生於乾隆五十六年辛亥歲七月二十八日卒於咸豐十一年辛酉歲九月十三日年七十有一子作霖卓懷作桂孫八人曾孫二

人封奉政大夫卓懷旋以四川候補知府加二級請封  
晉封中議大夫自君祖若父皆推封如其官

郭嵩燾曰馮氏遷長沙當元季爲舊族至萬縣君乃貴  
顯質直強毅伏一世及見君知其所從來遠也萬縣君  
以今相國曾公奏調江南還至家適君壽七十一其後  
由江南假歸而君病於君慶與憂皆在事福莫有隆焉  
者矣夫爲善者以子孫盛昌爲有後而命之豐嗇不常  
焉而身老且健以享其榮而益以達其志嗚呼豈非難  
哉

郭席儒傳

郭君諱芳鈐字席儒湘潭人生而倜儻豪縱自負奇氣  
不可一世顧性孝侍父母愉色婉容委順以聽日從里  
中羣兒嬉怒相搏拍張叫呶務陵其上聞母呼立止會  
兵事起兄松林從威毅伯曾公討賊數有功君聞奮曰  
吾兄志欲蕩平羣醜吾敢後時哉遽起告父母負劒以  
行曾公一見奇之使充旗長當前敵咸豐十一年圍安  
慶穴地道環攻賊死拒相咋城久不下君偶出見新薙  
髮者數人知爲賊謀召與語甚懼驟問曰城今破矣若  
等相與俱燼奚爲乎眾愕相顧君曰亟開城納官軍舍  
逆而從順以功論賞若等身家幸完榮施無窮數人者

皆拜盡以城中虛實輸君約某日夜官軍急攻東北而  
潛師西南吾屬舉火以應君亟還營獻狀至日大軍攻  
城東北隅急賊爭趨救而西南隅火起君躍馬馳至門  
大開賊回拒斬數人大呼躍入東北隅官軍亦乘城入  
遂復安慶論功擢守備自是君名大顯於軍中肅毅伯  
李公巡撫江蘇君兄松林以一軍從渡吳淞江連克嘉  
定江陰無錫金匱君皆領前隊以身陷陣擢游擊  
賞花翎攻金壇城外賊壘環列甚堅整君用降賊言請  
於李公賊壘堅密攻其一壘諸壘環救不可猝拔今聞  
中壘賊將與諸壘有隙必不出死力相救請募死士三

百人用夜半掩襲之果一戰毀其壘諸軍乘之悉平諸壘賊棄城遁李公上君功擢副將已而以父憂歸咸豐五年威毅伯曾公巡撫湖北君兄松林以提督從曾公堵剿河南捻匪君別將一營轉戰德安天門京山連破賊追剿至鍾祥之曰口賊驟至鈔圍官軍數十重君顧左右曰今日死矣然不手刃數賊而死非壯士橫刀馳突斬黃衣賊一人馬驚踣地賊縛君勸之降君笑曰若等亦聞郭大將軍號子美者乎乃吾兄也今日殺我明日將軍至斬馘若等如犬豕乃敢屈降而公賊大恚縛君懸之樹引大槍擊之斃時年二十有六也事聞

贈總兵雲騎尉世職建專祠君性故豪而慈良溫雅喜  
周濟擊賊金匱途遇兩書生守一老婦哭訊之則父死  
母飢無食病且死君時爲旗長罄所攜五十金給之兩  
生伏地謝求姓字而君已躍馬馳去其後赴安陸過一  
村父老遮道哭言村中壯者賊俘且盡遺老弱婦女數  
百人飢困不能起君惻然分軍行糧濟之告守令撫卹  
凡所至有惠愛焉

郭嵩燾曰國家承平久功業無所施才望無所須士大  
夫苟取充位而已豪傑偉人伏處沈淪驟遇事變羣顧  
愕眙而後乘時以赴事機之會功施爛於天下然其間

奮起冒白刃以不克竟其志者蓋可悲也中興以來立功名多吾楚人天下莫不歎羨或用以爲相忌忮刺譏而至不幸以死未嘗不流連慨慕重悲其人然則人心之公又豈忌忮刺譏之所能揜邪抑其人果賢而其死之果有足悲也予與子美同出吉安爲遠族始相識松江其後數相見功日高量日益宏竊意子美之勇傑猶有能及之至力勝艱鉅推賢讓功蘊蓄之深進德之勇誠無及者顧獨歎傷其弟之賢以爲世無有也惜其早死嗚呼其尤可悲也矣

沈仲怡家傳

君諱棣輝字仲怡姓沈氏浙江歸安人曾祖某祖某考某皆以公貴 贈通奉大夫沈氏故巨族世有顯仕

君幼穎異有至性年九歲而父旅死袁浦兄廉往奔喪君固請偕曾祖妣嚴太夫人祖妣吳太夫人憐之戒曰兒當畱侍我稍長從族兄鎬邳北通判任方築堰備河患君察其湍汎督工下榘隄堅湍伏因言治水當適其性勿遏其衝治民亦猶是也由是人知其才河帥麟公延請司章奏援例以通判分發廣東署雷防同知補永甯通判歷署廉州肇慶府兼護肇羅道清英土寇鄧南保等稱亂佛岡陽山君勦平之以功 賞花翎補韶

州府知府廣西賊李士奎劉八顏品瑤黃春晚等剽掠南甯橫廉之間踞欽州之那彭靈山之林墟爲巢穴眾數十萬勢張甚調君署廉州府事集兵得二千人戒曰賊方易我又屢勝而驕驕必無備我爲諸君襲破之潛師兼程入那彭賊巢倉卒出不意賊驚潰君以眾薄之殲焉因引兵急趨林墟分所部千人由大道多張旗鼓進擊自將一軍由間道出林墟後賊傾巢出拒而君已由間道入踞其巢遂躡賊廣平大寺平吉悉克之博白劉八者復率其黨數萬襲攻廉州君在欽州聞報急馳遇賊五里亭戰稍卻君大呼曰賊以十萬眾薄城退卽

全城俱陷矣今日之事有進無退斬先退者二人兵勇  
皆奮有楊身者手大纛陷陣眾繼之賊大潰廉人具鼓  
吹迎道左婦豎爭識君面傾城來觀道路填塞肩輿不  
能行望見君羅拜曰公來活我畱十餘日追勦劉八餘  
賊於沙河有馮子材者君知其沈毅善戰招撫之賊勢  
益孤而子材累戰功至廣西提督爲時名將由君收用  
之也久之賊復竄靈山君設伏早禾涌伺其半渡擊之  
賊盡殪劉八跳而免君卒生致之五黃山並其渠黨吳  
晚阮晚皆斬之西寇悉平陞授高廉道時兩廣總督徐  
公駐高州督勦羅鏡淩十八諸匪旋奉 命赴粵西

勦艇匪檄君取道北流鬱林至潯州上游會勦而以舟  
師截梧州君至潯州二十五里蒙墟賊舩三百餘環攻  
潯城勢危急君遣卒梯城入告援師之至且約期會戰  
潯州兵有難色左右亦謂君賊鋒方銳無遽進君怒曰  
吾與賊奴搏戰數十甯是之懼耶急引兵挑戰沿河設  
伏邀擊則縱火焚其船日夜不休賊怒登岸索戰君以  
偏師截其歸路大敗之賊宵遁君急檄水師迎擊而上  
躬率輕騎追躡賊前後爲官兵所乘沈其船無一脫者  
賞加按察使銜會徐公授 欽差大臣督辦湖  
南軍務檄君參軍事與沈君映鈐號大小二沈事皆取

決焉賊旣陷武昌犯江甯徐公罷歸兩廣總督葉公檄  
君回粵辦理軍需明年補雷瓊道未逾年而陳開之亂  
作陳開者福山博徒也咸豐四年三月倡亂佛山僞號  
大甯而省北何子海朱子儀豆皮春李文茂等各以眾  
數萬應之自石井石門金山官窯北接福山爲犄角環  
逼省垣旬日間反者四起連陷數十州縣城以外賊壘  
相望道路梗塞逆首陳洸瀧屯省河南水賊關巨何博  
奮等海艘數千阻河絕外援葉公檄君總辦軍務都守  
以下悉聽節制適肇慶協副將崔大同戰沒人心恟懼  
公選精銳四千人集帳下令曰坐守待斃孰與出戰爾

等敢死者從我殺賊眾皆奮君分兵爲四隊以一隊出  
小北門躡賊二隊當前衝分駐流化橋西山廟張兩翼  
伺之而以一隊伏城中備策應令前隊伏健卒深林覘  
賊所向又分其軍各數十人爲一隊多張旗幟以疑之  
賊四面薄城官兵四出相抵城上發巨礮助之賊驚反  
奔城中兵盡銳衝出諸伏兵齊起賊大奔自是不敢薄  
城相持六七月而河南陳洸瀧復約水賊撲城公曰事  
危矣吾當與決一死戰自率千餘人渡河沈舟絕回顧  
攻小港橋賊營竟日不能下君望見賊後營火大呼曰  
賊後營破矣眾皆奮起斫賊壘短兵接賊棄營潰走追

至沙河斬殺以萬計蓋賊後營不戒於火君得以閒乘之都司黃彬以舟師守省河與水賊相持戰數不利時有把總蘇海熟悉河道君令添造礮船募驍勇爲水卒廉知有何高漢者未應募賊何傳奮之弟也呼至謂曰爾與賊爲兄弟吾不爾疑但能殺賊予重賞何高漢伏地戰慄曰願盡力君卽令守大尾港口而東路賊艇又以間攻襲獵德礮臺君督舟師游擊賊終不敢入踞省河危城獲全君以佛山爲倡亂區錙重精銳所集佛山破餘匪可一戰而定乃調精兵三千合舟師與賊戰臨海廟是日大霧彌漫塞路眾懼止君君曰賊以霧不意

我出驚亂破之必矣進復瓜步礮臺焚壘濬賊營賊悉  
眾出拒君執桴鼓督眾前手刃數賊賊大敗次日分兵  
八路攻佛山賊懼乘夜浮海竄九江遂復佛山急分兵  
守要害部署甫定而賊已糾餘黨十三路來犯君亦分  
兵十三路應之時佛山人心未定新附者尙懷反側君  
明賞罰以安舊部布恩信以結新軍復分兵勦官窯小  
塘蘆苞等處以次蕩平當勦佛山時水賊鯉魚仔乘隙  
以礮船五百由石門入距城四里君聞警調舟師赴援  
至黃竹岐與賊艘遇下令各舟齊舉礮碎其巨艦而水  
寇黃幅何傳奮等艘尙數千環泊大石陳頭獵德檣帆

四集君曰我師孤注也可勝不可敗吾當併力攻大石使賊首尾不能自顧眾曰如約是日東風作君曰可矣麾舟師四出撫蘇海何高漢背曰成敗在此一舉何高漢揚帆上入賊水寨兵船繼之礮火蔽天君乘小舟往來策應而何高漢入賊陣奪其酋首巨艦以歸斃賊數萬君收兵東向餘賊悉揚帆由獅子洋遠遁賊黃幅者尙以戰艦千餘泊潭州自潭州至梧數百里皆賊君乘流由蓮花山進剿距賊數里命下旋以長龍艇數十伏舟後賊舟更番迭出擊我師君張蓋坐舟中指揮自若不爲動徐曰賊以舟連營可火攻也手揮長龍艇出乘

流縱火海風驟起賊惶遽斧纜而旋纜交加急切不得  
脫火賊舟幾盡賊大潰是日復順德次日復九江鶴山  
容奇陳村等處君卽自梧取道赴北江復清遠英德抵  
韶州賊聞卽解圍竄寇平授廣東按察使明年擢貴州  
布政使而君已以軍事積勞病且憊其年五月遂卒年  
六十有四 天子聞而憫焉 詔以布政司軍營  
立功後病故例賜卹 贈內閣學士銜 賜祭葬  
君少慷慨多大志讀書不爲章句博覽史籍沿革興廢  
治亂利病之原及人才高下得失燭照數計熟於胸中  
尤善讀孫吳兵法所歷州郡考求險要阨塞論其戰守

治軍明賞罰均甘苦當事不避難好謀能斷佛山陳開  
之亂土寇蜂起城以內賊黨環伺不可辨析人岌岌不  
自保公私埽地無餘兵食兩窮君以一身鉅細兼綜出  
則持刀殺賊入則握筦籌軍實人皆曰故督葉公靜鎮  
持大體成敗利鈍取決俄頃挈提綱維俾無傾覆翳君  
之賴嫡配劉夫人先君卒妾黃氏連氏子三長金鏗候  
選同知次金昆分發廣東補用同知劉夫人出三金潤  
承蔭知州連氏出女六孫四恩湛恩溥恩滂女孫

二

論曰沈君吾耳其名久至廣東觀其所設施而歎其才

天下之需才急矣強者治軍旅幹者理庶政苟人舉其職焉飭法齊政靡精以思彊力以行一軌同趨明作有功天下之亂其可以弭沈君沒蓋十年吾不及見之世變相尋財殫兵驕天時人事之推移日靡月銷而無有終極追求沈君之遺事流連太息想見其爲人孔子曰才難諒哉

唐蘋洲家傳

唐君逢辰字蘋洲江西萬載縣人父錫鐸畱壩廳同知有善政君自少卽習吏事隨父任析疑決策多所贊助援例以縣丞分發湖南湘潭縣丞升補耒陽縣知縣咸

豐二年粵賊洪秀全連陷郴州興甯永興逼近耒陽城  
居民遠徙一空君募勇得數十人乘城日伏城堞間夜  
輒炬火發礮賊偵至疑有重兵乃趨安仁北竄而君徵  
收民稅萬數千金方遣解省城而賊已陷永興或勸君  
畱勿遣君曰此數十人食城中見糧無虞缺乏賊卽至  
死耳吾畱此待賊乎立遣之行於是湖南巡撫以君守  
城捍賊而所收民稅不爲私利緩急可倚恃有意嚮用  
之矣明年調補湘鄉賊由金陵上犯再陷湖北省城上  
窺湖南以水陸各軍集省城乃西趨甯鄉陷湘潭擾及  
縣境君力扼石潭馬託使賊不得西竄在湘鄉四年廣

學額置賓興田前令朱君孫詒故有惠愛而君能繼之  
巡撫駱公屢奏君才可大用調署澧州治蝗尤有聲除  
慝懲奸鋤其強梗升補衡州府知府至則增修書院建  
試院更定育嬰同仁兩堂章程同治元年衡州荒穀騰  
貴君飭各屬開常平倉平糶設厰施粥以濟貧民以籌  
捐軍餉敘勞加道銜未幾卒於官君抱負奇偉而慈惠  
溫溫平易近人所至士服其教民感其誠令出惟行無  
有扞格自奉甚儉而敦尚友愛推分弟姪不有其私鄉  
鄰戚族貧不能贍者周濟無缺年過七十而聰強完固  
如少壯時論者謂其所負宏而施之不遐而一病且死

之尤可惜也

黃南坡事略

黃冕字服周號南坡岷州知州黃博次子年二十蒞官兩淮鹽大使奉檄治振淮揚有能聲道光五年洪澤湖口決運道梗塞大學士英和請行海運江蘇巡撫陶澍主其議知冕有才略使條具利病冕馳至上海集沙船與議盡得其要領乃條上便宜澍用其議行之海運所由始也補餘東場大使調補江都縣改元和縣調署上海旋署太倉州知州時大學士蔣攸銑及陶澍先後任兩江總督林則徐任江蘇巡撫察吏安民振發昭蘇惟

冕所治稱善有大興作皆倚以辦擢蘇州府總捕同知  
旋以知府候補歷署常州鎮江二府事冕凡所至必新  
書院學舍增給膏火接賢士大夫以禮示民以誠興利  
除弊惟恐不及尤善治水在元和疏治劉河海口數百  
里在上海濬蒲匯塘資其利以溉民田在常州郡北芙  
蓉江孟河二水分注大江江水漲倒灌入壤民田以爲  
常而芙蓉江兩岸沃壤數十里冕度地勢濬孟河以注  
江而跨芙蓉江爲隄以障之得田十萬八百畝地故有  
周公隄前明周公忱守常州時所築歲久無遺址至是  
冕復爲之常州人爲生祠附周公祠以祀兩江總督裕

謙督辦浙江洋務奏冤隨營差委謙死甯波之難浙江  
巡撫劉韻珂誘罪謙詞連冤遣戍伊犁會林則徐亦以  
洋務失機宜遣戍議興伊犁屯田伊犁將軍布奇泰上  
其事冤隨水所至輒爲溝澮以導之墾伊犁田十餘萬  
畝得免罪 賞六品頂戴還至江南江蘇巡撫陸建

瀛方議海運以冤初辦海運有成效喜甚與議方略於  
是盡革漕費歲省銀數十萬加運京倉米三十餘萬石  
爲御史劾奏歸長沙咸豐二年粵寇圍長沙時大兵皆  
出賊後倉卒無守具不知所爲冤時家居建議守禦巡  
撫張亮基藩司潘鐸皆新至凡冤所策畫立見施行城

園解保直隸知州明年賊陷金陵大學士曾國藩起鄉兵討賊湖南兵四出征伐餉運艱絀冕開釐局興鹽茶之利軍餉皆給焉又特開東征局專餉曾國藩一軍以功授吉安府知府時曾國藩駐軍江西獨省城數十里地無賊他郡縣皆陷冕起曾國荃於家使募一軍援吉安盡復吉安所屬十城國荃率軍東下冕復効免歸自是一以餉事自任積勞加布政司銜補授雲南迤西道湖南巡撫駱秉章憚世臨尤重冕有事必諮以行世臨旣効免冕亦謝病不赴官冕蒞仕宦三十年免歸又二十年任事無鉅細皆辦意量恢宏疏節簡目包舉無遺

而誠意盎然委己求賢人士多歸之自賊踞金陵京師  
轉漕獨有海運冕始終贊成其議功爲多亦以是積怨  
江浙之食漕利者屢被劾不一盡其用然道光以來言  
幹濟之略皆首推冕云卒年七十五湖南巡撫劉崐奏  
請從祀駱公祠

養知書屋文集卷十九

湘陰郭嵩燾筠仙著

曾文正公墓志

同治十有一年二月武英殿大學士總督兩江曾公薨於位 天子震悼贈太傅諡文正命儒臣撰賜祭文墓碑以葬公子紀澤紀鴻以銘墓之文屬之劉公蓉未及葬而劉公薨檢其遺書得所爲銘辭而前敘闕焉於是嵩燾涕泣承劉公之意而序之公諱國藩字伯涵號滌生湘鄉人咸豐初寇發廣西一隅之地所至糜爛盜踞金陵十四年盡蹂江浙兩省地披而有之公以侍郎

奉母喪歸起鄉里討賊奮其佔畢之儒粗糲之民邊長  
江萬里蹙賊踣之天下復覩乂安民用蘇息已而合淝  
李公平捻逆於鬲津湘陰左公殄回亂於關隴皆用公  
薦擢席其遺規遂蕝成功於時江以南構亂尤深公再  
督兩江噓枯翦蕝煦濡羣萌孤嫠有養儒宿有歸漸摩  
淳涵納之太和故公功在天下而江南之於公若引之  
以爲己私公始爲翰林窮極程朱性道之蘊博考名物  
熟精禮典以爲聖人經世宰物綱維萬事無他禮而已  
矣澆風可使之醇敝俗可使之興而其精微具存於古  
聖賢之文章故其爲學因文以證道嘗言載道者身也

而致遠者文天地民物之大典章制度之繁惟文能達而傳之俛焉日有孳孳以求信於心而當於古其平居抗心希古以美教化育人才爲己任而尤以知人名天下一見能辨其才之高下與其人之賢否蒙古塔齊布公新甯江忠烈公忠源衡陽彭公玉麐善化楊公岳斌或從末弁及諸生獎拔爲名臣其於左公宗棠趣向不同而奇左公智術以公義相取遂以顯聞卽受公一顧爭自琢磨砥礪敦尙名節在軍必立事功在官爲循吏曰吾不忍負曾公而公斂退虛抑勤求己過日夜憂危如不克勝自初仕及當天下重任始終一節未嘗有所

寬假及其臨大敵定大難從容審顧徐厝之安一無疑  
懼此公道德勛名被於天下施之萬世而其意量之闊  
深終莫得而罄其用而窺其藏也公以戊戌科進士改  
翰林又明年授檢討五轉至禮部侍郎

文宗卽

位求言公疏陳本原至計天下驚歎以爲唐宋名臣所  
不及典試江西未至丁母憂會廣西賊圍長沙

命

幫辦湖南團練治軍長沙又治水師衡州武昌再陷

命督師東征再克之轉戰江西丁父憂歸

上卽

位授大學士總督兩江節制三省而公弟太子少保威  
毅伯國荃以一軍特起復金陵

天子嘉勞錫公一

等毅勇侯晉太子太保旋調直隸總督復調兩江公生  
於嘉慶十六年辛未歲十月十一日薨於同治十一年  
壬申歲二月初四日年六十有二曾祖竟希祖玉屏父  
麟書自祖若父皆名德耆壽及見公爲侍郎受封光祿  
大夫妣皆一品夫人天下榮之配歐陽夫人子紀澤戶  
部郎中襲一等毅勇侯紀鴻 賞舉人女四人一適  
袁氏江蘇松江府知府芳瑛之子一適羅氏浙江甯紹  
台道追贈巡撫忠節公之子一適員外郎郭剛基嵩燾  
之冢子也一字聶氏孫三人廣鈞舉人廣鎔六部員外  
郎廣銓六部主事年皆幼 朝廷推恩賞官有差公識

量恢閔望而知其偉人生平趨舍是非求信諸心不與人爲去就一言一事研覈無遺尤務規其大而見其遠始出泊軍討賊以東南大勢在江險不宜盡弛與賊力請以水師自效爲

欽差大臣建三路進攻以規江

浙兩省之議討捻逆河南建合四省之力蹙賊一隅之議皆策之始受事之日其後成功一如公言在軍戈鋌樓櫓短長尺度躬自省量無或苟者榮辱得失無關其心而未嘗一念不周乎天下一事不盡乎民隱傳曰爲仁由己公無愧焉公學行功業具見國史本傳及合淝李公所撰神道碑不復論著著其生平志節關繫天下

之大者揭於公之墓而繫以劉公之銘

羅忠節公墓志銘

公諱澤南字仲嶽湘鄉羅氏少貧苦力學得程朱遺書讀之慨然有聖賢之志來學者日眾年三十二補縣學生咸豐元年舉孝廉方正時廣西賊竄湖南邑令朱公孫詒召公與故記名道壯武王公鑫今四川藩司劉公蓉募勇守禦時皆諸生而鑫公受業弟子已而與鑫各募三百人爲一軍從今相國曾公治兵長沙署其軍曰湘勇以平衡山桂東賊擢知縣旋從故湖北藩司夏公援江西分援吉安升同知明年曾公以水陸之師東征

公從下岳州功最擢知府

賞花翎進攻武昌克之

升授浙江甯紹台道與賊力戰田家鎮大戰兩日破之  
加按察司銜克黃梅廣濟

特賞葉普鏗額巴圖魯

勇號圍九江不下而湖廣總督楊需之師潰於廣濟黃  
梅武昌再陷賊潛自饒州趨廣信公馳軍救復其城又  
躡賊義甯蹙之以功加布政司銜公言武昌天下之衝  
長江險要尤所必爭上書曾公規畫天下大勢請由義  
甯間道出武昌時武昌以南自通城蒲圻嘉魚咸甯數  
百里賊屯相望公以一軍五千人左右馳擊七戰皆破  
之遂會湖北巡撫胡公軍洪山盡剋賊壘在郭外者當

是時湘勇之名聞天下天下望以討賊者曰羅公羅公咸豐六年三月初八日以攻城傷遽卒年四十九

特贈巡撫銜諡忠節江西湖南北建立專祠以祀焉公高顴方頤精力絕人讀書潛思力踐言動造次必以禮法究知天下大計敦慤沈密自任無疑在軍五年乘機應會出入神鬼熟習山川形勢制行度之宜臨敵從容沛然有餘人問公兵略所由曰知止而后有定定而后能靜靜而后能安安而后能慮數語盡之矣門人王公銓李公杏春李公續宜劉公典楊公昌濬數十人從問儒生性理之學後皆爲名將嗚呼公以諸生遭逢亂世

擊提子弟門生奮起立功名世謂公生必能平賊信矣  
而豈足以盡公之深也耶曾祖諱某祖諱某並贈通奉  
大夫父諱某封通奉大夫公卒 推恩賞加頭品頂

戴夫人張氏子兆作兆升皆賞給舉人女三人所著周  
易埶說孟子劄記西銘講義人極衍義姚江學辨皇輿  
要覽小學韻語及詩古文集若干卷刊行於世其年四  
月葬細鏡山祖塋既葬六年兆作使來請銘嵩燾曰然  
無銘無以張公之烈乃承事而爲之銘銘曰

非才薦榮黷我皇壇扶傾拯難烈士燿焉公以儒興乃  
奮於武手提一旅春規秋矩誰與從者及門英英鼓其

義勇提槩爲城國傷奚恤民勞奚訴公拊而嘻曰以吾  
故萬目仰視窺公設施以腦塗原竟死何毗著書明道  
同符聖哲維不朽三以揚公烈

陝西巡撫劉公墓志銘

公諱蓉字孟容號霞仙姓劉氏世爲湘鄉人少負奇氣  
能文不事科舉與同邑曾文正公羅忠節公力求程朱  
之學躡而從之尤務通知古今因革損益得失利病與  
其風俗及人才所以盛衰慨然有志於三代思一用其  
學術以興起教化維持天下之敝不樂貶道以求仕進  
年三十五邑令朱公孫貽陰使其父督就試補弟子員

會兵事起與羅忠節公王壯武公治團練里中已而從  
曾文正公長沙用團練功保訓導曾文正公旣克武漢  
轉戰江西羅忠節公從戰至義甯州上言曾公武昌再  
陷長江要害盡以資賊誠欲埽清江路以復金陵必自  
武漢始江西一隅利病非天下所繫請由義甯西出崇  
陽通城規武昌據天下形勝曾公壯而許之公力言羅  
軍去吾屬且坐困曾公曰吾固知其然然幸而復武漢  
天下事猶可爲今與俱困於此無益公曰誠然吾亦欲  
西耳於是羅忠節公以左營屬公累功保知府 賞  
花翎攻蒲圻弟蕃死焉公旣痛弟又傷父年高解兵歸

旋丁父憂咸豐十一年駱文忠公總督四川調公佐其軍遂以知府 賞三品頂戴署四川布政使尋實授

於時四川久困於賊陷城踞邑者數十而藍大順李短達爲最巨公策藍逆悍而李逆之黨多宜先其悍者急蹙藍逆於綿州又躡之丹稜李短達遺黨來援遂擊之眉州進圍青神而潛師擊丹稜大破之李逆亦以其間分踞合州定遠勢張甚公度賊勢緩急應之數殲其軍賊悉眾踞宜賓之八角寨而金陵巨寇石達開自黔竄入涪州遂至敘州滇南賊何金瀧又分竄筠連高珙與石逆合公念川賊勢漸平而石達開之氣方銳今並注

於敘其勢將合併以逞而不可遏急言於駱公請自視  
師敘州再戰擒石達開旋命督軍陝南就授陝西

巡撫時漢中已爲賊踞公力扼巴州而遭輕騎出甯羌  
復漢中以達長安會關隴饑甘肅回逆出沒北山捻逆  
又自商南內犯四川餘匪亦時闖入陝境公承死亡之  
後灰燼之餘外完疆宇搏擊剽悍推功獎勞而內拊循  
其民人噓枯蘇困開化勵學政教大行已而回逆驟薄  
省城存城兵四百人文武吏皆洵懼公曰賊遠至不知  
我虛實乘其計之未定可破而走也躬率四百人分兩  
翼馳而下賊驚顧大呼擊之果逸去陝西經亂久田卒

汙萊民無所得食公以鳳邠道黃輔辰精於吏事使經理回民叛產設法開治歲獲穀數百萬斛民安於耕吏勤於職廩廩然有望治之心矣以忌者中傷爲言官所劾疏辨語激

詔尙書羅惇衍治其罪坐降五級調用陝甘總督楊岳斌密疏懇畱

上意解仍署陝西

巡撫公以病乞解職乃畱陝辦理軍務而以喬松年巡撫陝西松年心嚟公所爲以不得逞其志齟齬甚會有灞橋之敗自劾歸同治十有二年十月初一日病眩遂卒年五十有八湖南巡撫王文韶以聞

詔復原官

四川陝西皆請祀公名宦四川又合祀之駱文忠公祠

公性沈毅而闊達開朗傾誠與人一無隱飾至其臨大敵決大計從容淡定內斷之心人莫測公所爲相顧驚疑事定乃大服在官與人以禮進退不以得失毀譽爲意解官歸自言志幾於道而行之有弗達學不足也天下之變無方而吾心之知有閒及是時勤吾學焉可矣於是益自刻厲築玩易閣讀書其中足不出庭戶七年其志意淵然求古聖賢所以治其身以及天下不幾於化不止也嗚呼此公之死所以重爲天下悲也曾祖恂南祖有璋父振宗以公貴 贈光祿大夫妣皆一品夫人配王夫人子鴻業員外郎三品頂戴 賞戴花

翎麒祥出後弟蕃世襲雲騎尉候選同知女四人長適  
戶部郎中世襲一等毅勇侯曾紀澤次適四川候補知  
縣陳達善餘未字孫六人公所著奏疏若干卷養晦堂  
詩文集十四卷思辨錄疑義二卷經史譏論甚繁皆未  
成書公卒之明年二月葬某山之原嵩燾會葬畢退而  
掇拾所聞以志於公之墓自公父以上世有顯德公父  
尤恢奇有才識嘗私語威毅伯曾公國荃天下之亂已  
兆無有能堪此者其吾滌生乎君與湘陰郭君及吾家  
阿蓉皆中興之資也時天下無事曾文正公以翰林官  
京師其言若可怪愕而後乃皆驗云銘曰

卷之三  
民勞俗敝賢達孳孳方其未遇與世若遺委心於民羣  
譏眾媚浩然剛大何有枉撓公起逢掖贊戎操翰扶艱  
植危手厝之安道申身蹇孰謂非善揖讓參回旬宣澹  
畎所學所行天下咸知意量淵閑朋知莫窺既沒還官  
廟堂所惜收功斂名以卽幽宅

誥授光祿大夫薛公墓志銘

公諱煥字覲堂姓薛氏敘州興文縣人曾祖錦奇祖灃  
父啓櫛以公貴 贈光祿大夫妣一品夫人公兄弟  
三人皆以學行顯兄某黔江縣教諭弟某華陽縣訓導  
而君用甲辰科舉人援例注選授金山縣知縣甫至大

府察其能會新陽災檄署新陽視振訖事乃赴金山數月婁縣盜發與金山有連坐罷旋以獲盜功復職廣西賊陷金陵公奉檄輸糧於軍向忠武公畱贊軍事保知府江蘇巡撫許公勦賊上海檄公自隨向公惜不遣公以上海重地餉源所出賊烏集利速進遲恐滋蔓請往規形勝自效向公壯而許之屬以川勇千五百人賊果平 賞花翎授松江府知府會奉賢民抗糧勢洶洶將爲變公聞馳至繫治一二人皆帖服無敢譁者調蘇州府知府遷糧儲道擢江蘇按察使轉江甯布政使旋改江蘇大府旣優公才事巨細倚公辦尤以上海洋務

利病所繫自糧儲道調署蘇松道其後屢遷官皆以畱  
辦洋務居上海已而賊陷蘇州巡撫徐公殉焉總督何  
公以罪逮問 詔晉公巡撫兼權兩江總督是時江

浙各城淪陷獨上海一隅倚公爲重而兵無可集將無  
可選惟張空名號召徵集乘城拒賊曾公文正督兩江  
奏以肅毅伯合肥李公視師上海攝巡撫事而公以

欽差大臣辦洋務公疏言洋務交涉地方宜總督兼  
任徒假虛名無益 上是之召入爲禮部左侍郎充

總理衙門大臣補工部右侍郎時英人理太號獻議募  
西洋水師助攻金陵曾文正公奏言金陵距江三十里

西洋大艦無所施理太虢以有成約持其議公爲疏析  
成約之言示以進退之權在我英使額爾金屈服卽日  
趣理太虢回國在總理衙門專務尊崇 國體正言侃  
侃念京營兵積弱請增練餉固根本坐與言事者互訐  
上怒落言事者職而鐫公級仍畱總理衙門旋以  
親老乞養歸光緒元年雲南戕斃馬加理 命湖廣  
總督李公往勘公副之由籍馳赴雲南旣定讞仍乞病  
歸公爲政持大體高瞻曠覽規畫遠利不爲苛細尤嚴  
邪正公私之辨意所許可屬吏微員委己下之其所不  
可雖貴勢與引決當否未嘗趨和承意卽有造請必視

其立身植行可擇而取是以生平於朋友矜己服善斷  
斷論辨而意常有餘歷久無變其初家居倡爲布政使  
劉公蓉建專祠及廣科舉中額勘置尊經書院有關吏  
治及人才學校之原其功尤偉始以乞養歸旣終喪奉  
使雲南而公亦遂病病三年卒光緒六年庚辰二月初  
三日也實生於嘉慶二十年乙亥十一月二十一日享  
年六十有六夫人趙氏次夫人金氏子三人華垣鹽運  
使銜以道員分省補用華坤蔭生按察使銜河南候補  
道先公卒華培庠生女五人長適戶部主事周鴻年次  
適一品蔭生李經畬湖廣總督李公之冢嗣也餘皆幼

孫四人嵩燾始督糧蘇松公以

欽差大臣駐上海

論洋務利病公喜稱善曾文正公疏辭通商大臣嵩燾  
抗言總督兼銜奚避爲人世非意之遭艱難險阻罵譏  
困辱惟當以常道處之負天下之重而任其謗苟求避  
之誰當任此者公聞益喜及聞嵩燾出使西洋公慨然  
曰吾兩人以洋務爲詎天下其庶幾奠安國家一湔斯  
言乎而嵩燾終以病免逾年李公函告公喪且屬以墓  
銘之文曰此公遺命也已又告言公葬有日不速銘無  
以掩諸幽於是敘次公生平大節遺諸其家泐之貞石  
而系以銘銘曰

發跡一邑兼圻貳卿以彰有功邁德揚聲進榮於朝  
退休於里延慶一身光明俊偉終其所懷己溺己飢道  
羸志絀所施蓋微施雖不多名則弗敝卒全終始光昭  
來裔

誥授光祿大夫劉公墓志銘

公諱典字伯敬一字克菴姓劉氏先世由江西徙衡山  
再徙甯鄉之白石寨遂爲甯鄉人曾祖繼揚祖振暉父  
允慎以公貴 贈光祿大夫曾祖妣牛氏周氏祖妣  
周氏 贈一品夫人妣蕭氏封一品太夫人家世業  
農而公起家文學自少開敏以文雄其曹及冠補縣學

生游學嶽麓城南兩書院得性理之書於湘鄉羅忠節公慨然有志於學雖爲諸生窮乏而節行有聞鄉里矣會羅仙寨盜匪發巡撫駱文忠公檄公捕治誅其酋保訓導從羅忠節公武昌會忠節公薨恪靖侯左公奉

詔起一軍從曾文正公江南檄公與王公開化今漕運總督楊公昌濬總營務曾文正公駐軍祁門賊環集困甚公急出江西拊其背爲聲援遂克景德鎮破賊樂平糧路始通擢知縣直隸州 賞花翎文正公奏以浙江軍務屬左公俾有專責分賊勢轉戰衢州復開化遂安等城功皆第一保知府道銜旋授浙江按察使始

用其字立克勇一軍連克湯溪蘭溪浦江諸暨各城浙東以平賊乘間上竄徽州左公以徽浙犄角賊至徽必反截我後檄公回援破走之賊渠黃汶金復竄江西急馳饒州蹙賊湖口力戰青山橋賊竄青陽太平踞賊又犯皖南急馳抵徽州遏甯國入徽之路 賞阿爾剛

阿巴圖魯名號加布政使銜左公大軍屯杭州賊分軍四擾以撓我軍公東西馳擊橐糴蓐食出奇奪隘以與賊還格其奔突以蔽大功方是時克勇之名聞天下會丁父憂有 詔歸治喪仍令會軍剿賊會金陵賊酋上竄江西於是有幫辦江皖軍務之 命旣洪福瑱

伏誅餘賊竄福建陷漳州左公總督閩浙於是有幫辦  
福建軍務之

命躡賊龍巖州破之賊竄廣東陷嘉

應州左公奉

命援粵公督軍擊賊塔子壩陣斬汪

海洋賊不能軍夜走黃沙嶂盡降之

賞雲騎尉世

職左公移督甘陝復奉幫辦陝甘軍務之

命授甘

肅按察使旋改三品卿銜甫至藍田河南捻匪擾及同  
州旋入晉陷吉州左公躡捻東行奏畱公陝西於是有  
督辦陝西軍務之

命兼署巡撫時陝回踞甯州之

董志原捻匪袁大魁合土寇十餘萬分踞雲巖瓦窯金  
頂山自延長延川至綏米花馬池懷榆數百里縱橫出

沒連歲大饑人相食公私赤立無餘公外支強敵而內拊循其民數月而陝亂定董志原回眾皆走金積堡公以其時濬鄭白舊渠引交水入城壕以便民汲脩治周文故陵地旋以母老乞歸會左公視師新疆又以三品卿幫辦軍務而委公以畱守之任公提挈綱維剔蕨噓枯隱幽畢達而遇事諮請以行不自張其名大軍西行萬餘里周廬止宿時兵緩急資食與兵應若咫尺左公屢疏言使臣壹志經營關外無內顧憂劉某之功爲多而公之心愈悴而病亦愈深矣以母老乞養請奉

旨數日薨於甘州時光緒四年十二月十五日也年六

十事

聞

賜祭葬

予謚果敏敕建專祠江

西安徽福建浙江陝西甘肅仍祀於其鄉子二本鑑候

選同知雲騎尉世職

特旨以知府用本鐸候選主

事

特旨用員外郎公英姿嶽立沈默寡言笑威嚴

若神臨事量敵指畫方略應機赴會不失銖黍用兵尤  
善審地勢每戰怒馬馳睨所在高阜騰躍四顧令某軍  
出某所某軍伏某所度地廣狹開闢變化惟意所使諸  
將趨走懾服既罷手一編集所將校論說道理和夷冲  
裕意若有餘家居五年置義莊建公祠以集族修試院  
置賓興田以勤學冊修忠義祠以旌忠育嬰堂安良所

皆置田以善俗得其一善足以傳世於公末也公弟倬雲從征討累有功保道員以公行狀來告曰公之葬

天子賜之碑文而銘墓之文久而未備無以據家大  
人之哀思惟先生能知公願有述也嵩燾因謹次其生  
平大節而爲之銘曰

下闕

誥授光祿大夫劉公墓志銘

公諱嶽昭字蓋臣姓劉氏湘鄉人自曾文正公以侍郎  
居憂奉 命治鄉團毅然自任討賊用戚氏練軍法

簡民兵教以句卒束伍節制之義而求忠信能讀書史  
者與共生死於是士之立名義者雲會景從天下蒸蒸

而得之鄉里尤多若羅忠節公王壯武公李忠武公李忠毅公彭壯節公蕭壯果公及公從兄武烈公皆起諸生位開府特進而公獨任封疆督撫十餘年位尤尊年尤高公始出佐蕭壯果公江西未知名每戰料敵先登壯果公奇之俾領一軍曰果後營壯果公假歸遂以軍事屬公轉戰瑞州臨江之交比有功由府經歷縣丞保知縣累保同知知府加晉道銜 賞花翎會石達開分黨自江西竄湖南公移軍茶陵備之而賊已直趨寶慶湖南巡撫駱公檄公馳援至柳家橋遏賊東路賊勢方東趨奮死力爭公堅營與盪決三日賊至輒披靡力

昨不得出已而諸軍竝集賊進退窮沮突圍去於是公名大顯石達開已出廣西折而北西趨綏甯城步掠龍山入川公日夜倍道馳躡而踏之賊不得喘息駱文忠公檄公從入川始至夔州適陳玉成陷隨州湖廣總督官文公以公距隨近檄使援急旋軍隨州時川寇方熾李秀成復犯江西曾文正公駱文忠公皆注意公勦辦羽符交下公以攻城不可委去以餒人心且軍動賊氛遂張荆襄大勢俱震爲患劇力持圍隨之議攻圍益急使降將劉維楨間賊誘致之設伏蹙其眾殲焉遂復其城晉保道員按察使

記名加布政使銜

賞鼓

勇巴圖魯自是亦遂以平賊綏定 國家爲己任專意  
西向是時川東西羣盜如毛不可爬梳大者數萬人小  
或數千各立名號踞城以抗官兵叫呶四應而石達開  
以二十餘萬眾趨石砦以窺涪州李復猷亦由黔入川  
謀與石達開合蓋皆江南悍賊渠魁意在擅地非他寇  
比宜急先此兩賊餘賊可以徐理也尤宜力阻遏其軍  
使不得合併至則擊石達開涪州又擊之綦江連擊之  
合江長甯興文所擊殺動數萬人川東以安力保敘南  
扼石李兩賊之衝四川布政使劉蓉遂以擒石達開雅  
州而公亦補授按察使旋擢雲南布政使駱文忠公前

後奏畱防川皆不遣擒斬賊目有名號者曰蕭王曰白  
侯曰鄒王凡十餘股石達開餘黨竄陷陝西漢中府公  
又躡之甯羌盡復漢中各城於是石達開餘黨斬刈以  
盡而川匪亦平滇黔各匪之擾川者竝集於黔黔患益  
棘川防驟不可紓駱文忠公奏請援黔而專其責於公  
川黔壤相接時綏陽陷於吳元彪正定陷於朱大王皆  
當蜀邊公擊破正定州城而綏陽守益固公視城北天  
台山高峻俯瞰各營賊嚴兵以守凡所據關隘十餘盡  
擊奪之獨天台山負險不下乃列陣其山前而從山後  
徑梯緣而上平其壘列成分屯綏陽失山險遂降賊劉

崑山者梟桀有名轄遵義百餘寨黔西七十餘洞仁懷三十餘寨勢張甚公戰擒之崑山請歸諭降遵義川西悉平旣降綏陽而綏南徑遵義以東亦平黔西北路始通奉

命巡撫雲南方行又奉總督雲貴之

命

雲南大亂二十年民回擾攘不相保持公曰此孱民怱起相毒螫當以德綏不當一以芟夷示武下令釋兵歸誠者弛其罪負固不悛則拊擊之旣至三年迺東迺南所失各城盡復同治十二年以述職 覲京師適歸道病言官論其稽畱罷歸公性沈毅遇事深籌熟計有發必告無有回惑疑難同官屬吏傾誠相與粹溫和夷情

意常有餘巡撫岑公負氣喜兵公至卽罷遣其軍凡有  
部署征伐一推岑公每有調發進止方略必悉究論始  
終若計其私岑公亦心折首肯自以積功至總督始一  
受事在軍久厭兵又閔民氣敝耗公私赤立吏道苦雜  
則一以課吏爲事督開墾招流亡視吏勤惰爲黜陟度  
時量力動無過舉尤汲汲務興學復書院勸厲人才人  
人感激思奮其治軍治民務除苛煩充然若有得者言  
者以是賢公而惜其退之非其咎而益以追歎其賢公  
生於道光四年甲申歲又七月二十五日卒於光緒六  
年癸未歲十一月二十三日年六十夫人彭氏子三人

鎮楚署廣東高雷廉瓊兵備道錫恩某官錫勳某官女  
五人其二妾唐氏出也孫六人旣卒逾年卜葬某鄉某  
山之原以嵩壽之習公也屬爲之銘銘曰

在歲丙辰臨瑞交兵桓桓武烈於公爲兄批獷洞堅搏  
呼乘城卒藩江蠡而以命傾公於是時追隨壯果悚首  
腰鞬握刀在左外示樸訥屹立磊砢驍然奔敵膏軸笑  
輟武烈之生未竟其施公奮六翮負雲而馳東西兩川  
顧盼旌麾盪滌瑕垢乾清坤夷餘功及黔兼滇作誓狼  
嗥獸駭狍猖相屬睨公來蘇如日在旭綬之動之風噓  
雨沃三年政成展 覲歸藩疾病不除諧言幡幡顧瞻

令子累功襲 恩一瞑百世以貽後昆

誥授資政大夫署理福建巡撫周公墓志銘

公諱開錫字受山姓周氏益陽人曾祖定績實有二子  
長曰澤珩次曰澤琥珩後有二子長曰揚之以拔貢生  
充戶部七品小京官改主事次曰振之以乙未科進士  
歷官河南商城虞城知縣卒祀名宦澤琥早卒無子以  
振之爲子振之又無子於是公以父命爲之後自始從  
其父宦京師以能詩文有名屢試輒屈迨丁父憂年長  
矣困益甚咸豐二年廣西賊自湖南下竄起湘鄉曾文  
正公於家督師討賊公上書言兵食機宜退與其鄉人

治團練轉食餼軍又明年賊襲破水師九江武昌再陷  
胡文忠公自湖口回援遂爲湖北巡撫公又轉食餼鄂  
軍累勞保府經歷縣丞胡文忠公復武漢上言吏事與  
兵事相輔治亂之本莫先察吏檄公以知縣畱湖北候  
補再保知州署沔陽州事明年公贊胡文忠公軍事於  
英山戰賊集賢關以功保知府 賞花翎文忠公疏

薦人才自劉公蓉沈公葆楨以下十人公名與焉文忠  
公薨公改從左公宗棠浙江署溫州府知府兼攝溫台  
道 擢授浙江糧道左公總督閩浙公從赴閩改授

福建延邵建道署布政使司旋護理福建巡撫左公仿

西洋法製造機船設船政局以公兼提調左公調督陝甘公復從赴甘肅總統甘肅南路諸軍平金積堡克復渭源狄道皆有功辛未五月十五日以病卒於軍公性疏爽而沈毅有智謀能斷視天下事無險易沛然任之意常有餘尤喜因事規久遠之利不以難自沮始治團練以益民歲困於漕究知其利弊勘爲里征之法析縣爲四區擇鄉賢者督征畢征輸之縣而致贏餘於官官民兩利遂爲定法署沔陽州州介江漢之衝尤苦水公以自唐宋來廢陂湖爲田失溝渠之利因上治水三策以疏濬引河分水勢爲義其下策則令潛江堵築排沙

渡口澤口令天門堵築紫貝淵口吳淵口曰是苟以自  
完而已天潛完洩以幸完躬至潛江天門察水勢緩急  
仍請因漢北故支津多引水入江功未竟罷去其任溫  
台處道時值江浙淪陷獨所屬差完土寇乘機竊發所  
在道梗公急情吏治求賢士夫與其理剟剔爬梳內外  
斬斬數出師船擊盜海外盜賊屏跡轉餉大營無虛日  
所治溫州遂爲重鎮左公督閩命公先籌畫軍食公至  
歎曰安有富强若此而委之一二庸吏以取坐困急簡  
才能任之歲綜山海之入課估驟增餉四五百萬署布  
政使司益通府縣出入之數爲設條令除苛派在官衣

食取給皆有常制專務便民利國又以驛道供張爲累州縣一切準依常例無許踰越驛置游卒及馬皆布政司委官經紀凡所規畫必權利害輕重使可經久其私取便利者悉刮去之造端宏大入見者驚疑怯顧而公斷行不疑其終翕然稱便焉既至甘肅請於左公曰母老多病而遠從公恬然挾刀筆贊方略何以爲心請爲公前殺賊左公大喜時甘肅舊徵兵勇萬餘人莫相統紀遂以委公凡數十營畱駐鞏昌皆宿將自爲制驕罷不任戰頡頏叫呶作氣勢無知有軍法者公自以任事不避難遂亦不辭於是簡軍實明約束陰求將官材武

者委任以事守固而後戰謀定而後行連克渭源狄道諸縣進規河州會病亟猶至秦州計畫軍事甫就道氣絕久之蘇回鞏昌五日卒公生於道光六年丙戌七月初八日卒於同治十年辛未五月十五日年四十有三世以公貴

贈資政大夫妣皆夫人初娶何氏繼

娶熊氏子先湄早逝以兄開鑑子先濬爲嗣公高顴廣額目炯炯有光口能容拳自少有經世之志寬宏愛人意豁如也臨事立崖岸意有不可面折人無阿回而要務持大體興事立功必訖於成人與游憚其亢直莫敢近久而皆服其誠其總統甘南諸軍言厯事紛至爲蜚

語達京師言官數論劾之及聞其病奔走祈禳相告語若憂所親其卒也哭之皆哀此亦足見公之爲人矣嵩燾於公久故相厚也又益相期許其弟開銘官翰林實從受業旣葬有日來告曰願有述也乃詮次其生平納之礦而綴以銘銘曰

年屈於仕名則加溢校其才能百未試一萬夫斂手艱大孰投於公是資匪競匪綵本以吏顯進退舒卷終焉委命旌旗在眼功成中闕其施有光銘以揭之萬世之藏

署廣東鹽運使羅君墓志銘

君諱勳字子銘姓羅氏世爲安化人故雲貴總督文僖公次子也文僖公別字蘇溪君因自號小溪家世貴顯文章氣誼傾一時君益以才自高視天下事在吾掌握聲名位業惟所掇取於人罕所當意遇有不可以氣陵之箕踞大呶譙呵指撝然熟於人情利病險易規時度勢引其端緒窮竟細微以故忌者多而無能持其短長相傾搆者文僖公治軍襄陽及總督雲貴無素練之軍無取資之餉軍書旁午寇至無時一倚君爲辦文僖公薨免喪乃以道員就選京師時廣東海防大潰總督駐惠州巡撫駐韶州官吏望風引避君慨然曰此吾時也

養知書屋文集

卷十九

三

惟所處難則功易施卽詣部占注廣東旣至而勞文毅公移督兩廣尤重君才氣卽有疑難一以諮君已而權鹽運使事君責拒商督鹽責埠商督運定課程嚴句稽終君任歲銷倍常額吏無敢欺以事故事運商行鹽一引納所餘鹽貯之倉曰常平鹽以備乏會軍興餉缺君上言常平鹽積存無數可紀見存者數十萬可資以充餉文毅公與羅尙書惇衍故有忤撫其失効之調雲貴以去而怨君者因爲蜚語中傷君署督晏端書劾君擅動常平倉鹽落職自是存鹽十餘萬無旨不得擅發而舊存者累萬萬爲官吏侵盜以盡悉弛不問君自

以廣東督鹽勞最著罷官不以實鬱鬱不自得恥更以  
人世功名爲意西安將軍庫克什泰奏君幫辦軍務辭  
不赴署所居室曰蟄廬春秋行田賓客朋游雅歌投壺  
益務肆力於詩終老而意氣不少衰辨論得失常斷斷  
然未嘗引服讓人人亦憚君能莫敢與抗君生於某年  
月日卒於某年月日年五十有四初配傅夫人繼配楊  
夫人再配劉夫人子二某某以卒之明年己卯二月葬  
於益陽鴉樹嶺之原君少豪宕徵歌選色窮日夜爲歡  
比歸痛自刮除舊習清修獨處客至徑造其室笑語款  
曲旣罷引去隱戶據几手一書寂若無人劉夫人賢明

治家有法不以煩君卽有事引商理處兩婢執燭前導  
夫人延之戶外東西相向坐若嚴賓語畢又導以出喜  
蓄名馬日晡一小奚負胡牀從列廡高下玩其神駿清  
坐相對意常有餘將其中有不自適者而脫然於世累  
耶其才高樂觀世變欲以有爲而終所守如是是可哀  
也已銘曰

古人有言其智能謀其巧能辨又昇之時迎機觀變惟  
變無端顛覆乾坤孰綱維是固鍵重門莫爲者天因時  
爲量獨奮其能以與時抗吁嗟羅君而止於斯一瞑萬  
世忌者安施

湖南鹽法長寶道郭君墓志銘

君諱從矩字定軒姓郭氏世爲山西長治縣人祖諱某父諱某皆不仕君生十三歲而孤事其母朱孀人以孝聞年十六與其兄明軒同入學籍爲弟子員旋舉戊午科鄉試庚申成進士改翰林院庶吉士逾年散館授編修轉監察御史丁母喪服除仍爲御史擢給事中旋轉吏科掌印補授湖南鹽法長寶道再署湖南按察使以光緒十一年十一月二十九日疾終按察使任年五十有一同治光緒間 朝廷憂邊事急屢下求言 詔獎進御史備詢方略而淮南鹽法數變更公私利病中

外劫劫相持君一論伊犁事宜一論鹽法皆洞悉厥要  
得

旨施行河北連數省大旱積四五年已又大雨  
山東河患尤甚君疏請端本

君身以回天變以講

學崇儒爲育才之本以砥礪廉隅爲清吏之本以崇尚  
節儉爲正俗之本而論君子小人陰陽消息之機語尤  
切至論者謂十餘年言事諸臣獨君此疏有唐宋諫臣  
之風在湖南六年其時檢治吏事多爲苛察而君務守  
大體持平初權按察使益陽民謀亂有迹君奉檄往勘  
因言造亂者一二人而已幸及未發按誅之事發則所  
誅殺數十百人猶未足勝也亟馳至誅倡亂者易龍泉

一人事立寢凡君所爲一主寬大未嘗拂人意然病亟時伏枕省文書意有不可乙去之辨斥斷斷始知其中有定守且死而神明不衰也君性故和易居官與人開誠布公意常有餘尤篤於故舊官俸所入一周親故室無儲侍其有罷官不得歸君爲恤其家巡寒省飢月有餼歲有贍所存活者常多不爲其家有無顧慮君始娶梁氏繼娶葉氏子一人寶清其官湖南二年葉恭人卒又二年其兄明軒又卒始命其子奉葉恭人之柩葬長治梁恭人兆右比返湖南而君已病卒矣遺命合葬寶清乃具其事狀求銘銘曰

始初見君貌溫語良於人無校亦無否臧無忤於物應時弛張及久與習心虛氣下研窮書旨鍥而不舍作爲文章相就斟酌一言之契如石引鍼謂如君者可與適道推及吾民噓寒呵燠六年湘楚未竟其施生無畱年沒無遺資庶幾善人惟心之遂百年一瞑豈有同異

張少衡先生墓志銘

張少衡先生旣卒二十有四年遺命不爲行狀及銘墓之文詔其子自牧曰若是以爲名也其將紹述吾學而光大之無以名而以實其可乎已而軍事起自牧積勞至道員加布政使銜以其官

贈先生榮祿大夫盡

刻其遺書曰周易輯義十二卷曰詩義鈔八卷曰禮記輯義八十卷曰春秋經義百二十卷曰聽園文存二十四卷於是先生之學大光顯矣同治十有三年重治鶴壽山墓道以告於嵩燾曰吾先公不欲爲名以自張也自牧惴惴焉懼墮棄先人名德未敢有忘而訖於今無文於墓將使後世子孫無以考覽先人之德業以稱其家世自牧蓋尤懼焉誠得君文紀其實襲而掩之被之無窮猶先公之志也烏虜若先生者何所資於吾文然綜敘先賢政蹟與其著書固亦後死者之責也先生諱學尹字子任一字少衡晚年自號聽翁世爲湘陰人先

世以行賈寄籍宛平既舉進士奉父喪歸葬復爲湘陰人改官卽用知縣籤發福建署歸化莆田縣事補閩清縣知縣調補侯官擢臺灣府北路理番同知代理興化府知府以忌者中傷罷官歸歸而著書講學三十年年七十七乃卒先生赴官福建汪尙書志伊方總督閩浙考按吏事甄敘人才尤勤於治盜獨謂先生精敏值事龐劇它令不能辦治以任先生先生亦喜自負誅鉏梗化無避嫌怨捕盜爲句距之術推求按驗有發必覺抉姦擿伏肅若神明而要務爲民利未嘗有苛刻激激之行歸化地磽無生計民皆傭旁縣造紙先生課之種竹

求得養竹法十餘事逾年竹成歸化紙遂爲閩中冠縣  
民張楊羅三姓日爲姦猾相訐控先生知其宋儒裔舊  
有橫渠龜山豫章三先生祠爲詣祠講西銘及豫章從  
事龜山淵源三姓人皆感服罷訟莆田馬洋盜發都司  
廖起貴蔽罪平海澳漁者汪公怒檄副將慶善會捕先  
生驚曰果漁者一健捕收繫之有餘多兵何爲誠往澳  
人殆矣因以計羈畱會捕兵急馳至澳集驗漁戶無出  
洋者告之故皆涕泣願從入縣受質先生以能口給十  
人行而上白漁戶無罪十人者皆得釋聞清俗停棺不  
葬歲久暴露先生收瘞之下令死三年不葬官爲收瘞

民爭卽山以葬俗以大變侯官故有荔枝貢先生爲定  
經制歲課園戶二百株備貢貢甫入而報言二百株槁  
且盡總督董公詰責急先生召示園戶則已別儲二百  
株以竢董公爲革領貢者承辦之名自是貢樹爲常例  
先生所至尤喜以儒術潤飾吏事興教化美風俗雖處  
繁勞御獷悍之民溫然若子弟之相接閩俗喜械鬪先  
生聞輒馳至以身捍之徐徐開說道義皆惛伏退聽其  
罷官以失貴胄意先生顧自喜曰吾道於世有宜不宜  
天也歸勤吾學在我而已吾何歉焉先生治經尤邃於  
春秋自漢以來說春秋數十百家窮攷其源流校論其

得失而一準之經以發明聖人之用心三代典禮與春秋所以異同由聖人言推知其然諸儒之說或合或否若操繩尺以繫度長短無爽錙銖常自言諸經有所論述一守先儒之遺未嘗自爲說惟春秋自得於聖人之意爲多其治他經亦多取舊說融會貫通而立論詳贍典雅自盡其意故世尤高先生之文章門人子弟刊行所說經曰師白山房講易曰毛詩講義其後皆有更定春秋獨晚成未及刊行而卒先生生於乾隆四十年乙未歲八月八日卒於咸豐元年辛亥歲九月十九日曾祖曰永嘉祖曰世湖考曰掄梁例貢生候選州同自祖

以下並以自牧貴

贈榮祿大夫妣皆夫人配殷夫

人繼配蔡夫人側室楊夫人子二虯河南候補州同前  
卒自牧諸生以道員遇缺題奏加布政使銜瑚松額巴  
圖魯自牧蔡夫人出也而母楊夫人得並封女子子一  
人適衡山陳源 旌表節孝孫九人道琮湖北候補州  
同鴻分發候補知府璫分部行走郎中瑩鹽提舉銜候  
選鹽大使餘皆幼女孫九人曾孫二人先生罷官里居  
三十年在官行事未嘗爲人言又戒不求人文自表著  
至是距先生去官時且六十年自牧乃采取去閩送別  
詩冊及閩人所刻三山謠略存其事蹟以志於先生之

墓其春秋經義采擇未備自牧亦補具數十百條刊行於世於先生爲有賢嗣矣是固宜銘銘曰

有儒一生屈子之鄉勤學及耄載晞其光作宦於閩其施未閤有擠而踣斯文以昌堂堂六經掇拾散亡春秋聖功其義微芒權衡古先如尺在量生世不諧惟直以方沛然文詞與道偕臧厥嗣紹家纂承闡揚遺書在笥光燭湖湘廿年斯邱山高水長鐫石埋銘以詔茫茫

湖南卽補知府戚君墓志銘

君諱天保字少雲姓戚氏世居湖北沔陽州之沙湖鎮曾祖壽庚祖世煌父從龍以君貴 贈朝議大夫君性

養知書屋文集

卷十九

三

孝友勤學勵志始就傅朝議公授以小學卽能釋其義  
稍長館於外家事一委之弟館穀所入悉歸之無私財  
善飲偶醉太恭人責之自是終其身不復過飲道光八  
年舉於鄉二十七年丁未始成進士以卽用知縣分發  
湖南初署安化治盜有聲調署新甯時廣西會匪蠢伏  
勢日張新甯匪民勾結入其黨江忠烈公起團練擒逆  
首雷再浩當事懷姑息不肯窮治逾年而李沅發之亂  
作據新甯城君至急會今四川方伯江公練勇設方略  
斷賊接濟方伯忠烈公之弟也時爲諸生會總督裕公  
提督向公誘賊紫金山擒之新甯賊平保升同知直隸

州公念新甯巖邑逾年而反者再起下忿戾而無學上  
優容而無教此亂源也乃治文廟設學課拔諸生之秀  
良者以鄉團相保之法捕誅會匪絕其根株於是今直  
隸總督劉公江西巡撫劉公皆以諸生起家爲國討賊  
立功新甯義勇之名聞天下開之者江忠烈公而承大  
亂之後彌縫匡正獎掖以起者君之力也旋補常甯泣  
事二十五日會江忠烈公撫皖被圍廬州檄君與今四  
川方伯募民兵赴援君督後隊至湖北黃岡聞廬州陷  
病作遂自免歸咸豐三年調補長沙以病未赴任升補  
澧州知州旋調郴州亂民邱昌道聚眾爲寇君至卽部

署鄉勇擒之以功保升知府而廣東賊瞿火姑爲官兵扼之連平急趨郴州數萬人蜂至出不意州城陷君急投城河得救免以協剿有功爲民愛戴雖被議仍復舊職咸豐十一年署寶慶府事以籌餉功保加道銜明年委辦衡州釐捐以同治五年七月初七日卒於衡州年六十有五配萬恭人子一開萃咸豐己未舉人雲南浪穹縣知縣早卒女三孫一文相君姪開莊將以其年歸葬君某山某原丐余銘其藏余與君丁未同舉進士始相知自是二十年見君更歷險夷榮悴常若充然有以自得於心值事變艱煩憂勞子子相顧口噤而君徐起

應之有餘才足以副其志量足以貞其遇是宜壽而享者而止於是命也雖然同年生如莊寄漁黃子春王槐軒葉辰生雷蘊峯同官於楚皆年少才望隆隆十餘年死亡幾盡存者任芑堂張子聯官亦不豐君於時年獨長仕宦亦稍顯矣其得之命者固猶幸與而自數年來子開萃領鄉薦旅卒孫亦天其二獨一小孫年五齡耳開萃嘗從余學又賢子也君之老境哀傷逾度以不得盡其年又足悲也銘曰

甲子一終又羸五年世相循倏焉古百川騰沸驢九宇滌姦爲良張我楚在身非腴所效撫藐孤一孫繩祖武

涉沔循邱奠幽園於後有徵視茲土

胡文忠公神道碑銘

故太子太保湖北巡撫謚文忠胡公諱林翼字貺生一字潤芝湖南益陽人自少以文學起家侍從爲國家討賊立功任節鉞公忠果毅始終一節言者謂數十年來封疆大臣治行才望莫或逮公其薨也天下士大夫同聲悼歎失所仰賴而公是時年甫五十志氣恢然其施方長以是哀之尤深公以道光十六年進士官翰林充庚子科江南鄉試副考官正考官故大學士文端公文慶因事落職公亦牽連被議援例以知府分發貴州

歷署安順鎮遠思南諸府事補黎平府知府擢貴東道  
是時東南寇亂萌孽黔苗鴟張寢甚武備積弛公所至  
練民兵捕治巨憝覆其巢穴懲姦佑良威信大著於是  
人皆以公爲知兵矣雲貴總督吳文節公文鎔調任湖  
廣奏公襄軍事公募黔勇千人以行抵通城而武昌陷  
吳公戰沒湖南巡撫駱公秉章檄公回保湖南已而今  
大學士毅勇侯曾公國藩會水陸之師東討公從至九  
江與故甯紹台道羅忠節公澤南攻湖口梅家洲賊壘  
未下而賊襲破九江水師大營悉眾上犯武昌公時已  
擢湖北臬司曰我湖北官也義當回援請於曾公得副

將王國才三千人以行再擢湖北藩司授巡撫益與今  
兵部侍郎彭公玉麟收集水師扼金口爲守賊是以不  
得越武昌而南會今陝甘總督楊公岳斌與羅忠節公  
先後至力戰逾年遂復武昌公以一身支柱艱危公私  
埽地無餘獨負其忠義感發摩厲旣挫益奮義無返顧  
卒收全功於是一以討賊自效旣克九江披賊勢遂與  
曾公定三路東下之策而今湖北巡撫曾公國荃圍安  
慶逾年軍不得進賊以其間陷黃州隲十餘城進逼武  
昌圖解安慶圍公屹不爲動督戰益急其時寢疾已深  
亦念武昌根本悉諸軍畱安慶而自回武昌鎮撫賊聞

公至遁走安慶亦隨下

顯皇帝憫公勞晉加太

子太保予騎都尉世職先是英吉利夷酋入京師

顯皇帝幸熱河公疏請勤王有

詔止行而

乘輿久駐熱河以至大漸公以受

知深不能出死

力爲 朝廷攘除外患解弛憂勤感激哀號疾遂篤以

其年八月二十六日薨於武昌

詔加總督諡文忠

入祀賢良祠

今皇帝卽位之三年旣定江南追念

公成勞再予輕車都尉世職嗚呼公以忠孝挺生受事

國家危難之際外總軍旅內撫循百姓廩廩焉講求

整飭吏事進賢退不肖一以公義不參己私又益念

列聖培植之遺人才蔚然致上理二百年訖於輓  
近賢能失職釀患保姦習以成風馴至大亂慨然以獎  
進人才爲己任其所論薦多爲名臣 朝廷亦知公忠  
勤每有擢拔得公一言斷行無疑公少以才氣自豪視  
世俗無當意者晚年學益進氣益斂抑然常自以不足  
得人一長一技必務推而致之 國家以使效其用臨  
大事決大策惟斷惟果退而論辨其得失委棄己能順  
從於人天下以是尤服公之德量公之考少詹事公以  
學行聞天下著有弟子箴言公承先志建箴言書院悉  
所藏書納其中因言天下事非能通知古今有學術豈

足勝此庶幾後來英秀有讀吾書而興起者公之引揚  
世澤作興人才以是綏靖我國家庶永有賴嗚呼豈  
易能哉豈易能哉嵩燾旣譜公行狀次其家世與其生  
平偉節軼行甚具故獨取其有關天下國家之大者  
以揭於公之墓道而係以銘銘曰

樞機之司以國榮悴緯以提封扶翹剡蕝嶽嶽文忠受  
命傾危披山導川返於康夷民有療呻是咻是煦吏有  
困瘥相其礪臚度地均賦蠲滌煩苛翕張以仁納之太  
和公曰眇爾爲益能幾廢興由人孰究厥指窮幽扶遐  
揚於王庭蓀椒揭車擷其芳馨維公一身聖清

之毗奮起東南挈提綱維豈翳鄂民私公歌哭天地風  
霾震驚淵谷公魂曷憑 詔祀賢良萬人墮淚翳公

之藏

署理四川潼川府知府彭公墓志銘

公諱洋中字彥深一字曉杭先世由江西徙茶陵再徙  
湘鄉遂爲湘鄉人曾祖諱繩久妣李氏祖諱祖與妣王  
氏考諱興緒妣胡氏自公祖以行義名鄉里及公貴追  
贈兩世中憲大夫妣皆恭人公年始冠舉於鄉文  
名藉甚然終不得一舉進士以大挑官邵陽縣學訓導  
公爲邵陽學官自其郡若縣政治利病得失及士民之

良莠周知熟覽衡量輕重以措於理莫或踰越邵陽士  
以爲得師郡守及令苟欲舉其職以爲得所諮詢他縣  
之往來邵陽者亦以與聞議論災道德之餘輝開發啟  
迪得所歸仰道光之季粵西寇亂萌孽其黨散布寶慶  
實始發難反者四起故湖北臬司長白魁聯守寶慶日  
夕孜孜披剔姦頑期遏亂萌所與謀者幕客王治模及  
公公寄耳目士民往往下府符村社縛獻首逆致之法  
令以下皆弗聞以是忌且懟而終使盜賊弭息士民大  
歡則又相與德公及廣西賊起公益佐郡治保甲團練  
獻議積穀郡城得萬五千餘石其後廣西餘賊屢犯郡

境及石達開自金陵率數十萬眾掠江西而南圍郡城三月賴所儲穀濟軍食而各鄉團練亦皆能據險殺賊於是寶慶屹然爲重鎮忠義勇敢之士奮起立功名亦多出於其間皆曰微太守魁公吾屬終陷賊耳微公亦誰與佐太守以有成功寶慶圍解得優敘選授雲南定遠縣知縣而兩江總督曾公廣西巡撫勞公皆具公名上聞請隨營差遣會今大學士駱公辦理四川軍務奏公自隨駱公旋總督四川自川南北盜賊充斥石達開又由廣西陷石砭廳掠豐都而北圍涪州徵兵急命公總辦釐務佐軍遂以同知畱四川候補晉擢知府加道

銜委署潼川府事至則詢問民生疾苦督飭屬吏禁門  
丁差役需索日坐堂皇治官事聽訟獄興敎勸學一新  
庶務潼川饑公自轉粟鄰州姦民乘機遏糶公請於大  
府卒得轉粟以食飢民並通禁州縣之遏糶者居潼川  
半載士民相與誦曰循吏循吏無異詞其年甲子十一  
月病遂卒年六十二配胡氏繼配左氏子一人廷弼女  
六人皆適士族孫一人焜光殤公豐頤廣顙沈厚端毅  
精力絕人遇事推求始末窮極幽微度可行行之必要  
於成卽不可行究論端委務盡其說生平自信所學以  
濟實用而已視人世毀譽無足動其心者而所至信從

既久益懷思之終亦無忤於人文章書法卓絕一時尤  
喜表章先賢偉節軼行新化鄧先生譔沅湘耆舊集纂  
輯郡志建前後五忠祠十先生祠宋明以來郡人士及  
官寶慶死事諸賢皆列俎豆褒顯無遺倡其議者鄧先  
生贊襄考訂與爲始終翳公之力及公蒞仕四川年老  
矣汲汲焉思一攄所抱求所以變化人心風俗而躬自  
砥礪勞苦以正其始其神明內充沛然不窮其用且死  
猶爲詩四章詔其子廷弼用浣花牋書之蒼勁不減平  
時去屬纊時纔一日也其詩有曰平生虛願大太息一  
無成讀其言思其人而哀之廷弼敘次公行狀請銘銘

曰

塿塿之土維郡與縣其賢其違安危顯見天畀公才以  
康世屯臨老一試洞幽討源羣恬以嬉而公劫劫謳聲  
四達姦摧暴悞否道未終先以公傾校其所得誰虧誰  
成名成身逝遺詩在篋同孫二齡悲鳴夢呬柰何乎公  
又以孫隨嗟嗟廉吏而不可爲不可而可潼民思我有  
義者墳湘西漣左